

Promer Minister Eman:

"Famia de Veer y Aruba por ta orguyoso di e Fabrica di Balashi"



ORANJESTAD (AAN): Promer Minister Mike Eman a keda hopi impresionado durante su bishita na e instalacionnan na Balashi cu ta produci e cerbes di e mesun nomber, hunto cu diferente otro productonan di bebe. Sr. Eman a haya un recorrido di e planta cu tin un sistema automatiza cu a keda introduci recientemente, ademas a mira con bentafoso e 400 panelnan solar ta.

Durante e bishita aki Promer Minister Eman a haya un recorrido di un delegacion di e compania consistiendo di: Ingmar Ramharakh, Quality Safety and Environmental Coordinator; Wendell Bennett, Managing Director; Kenneth Bikker, Financial Director y Nicole Martina, Sales Manager. Durante e recorrido tambe a cera conoci cu Klaus Eckert- Director tecnico y Patrick Melchior, coordinador di Marketing.


"Impresionante. Hopi impresion mi a keda cu e operacion di Balashi. Di pafu bo ta mir'e grandi, pero loke ta worde haci paden ta mas grandi ainda y mas sofisticada di loke un hende por pensa. Esey ta un motibo pa ta orguyoso cu nos tin un cerbes cu ta worde produci na Aruba." E mandatario a haya un splicacion amplio di tur e controlnan cu ta worde haci pa sigura un cerbez di calidad haltisimo cu ta worde exporta tambe.

"Esaki ta duna nos un desaroyo economico adicional," e mandatario a comenta na final di su bishita. E ta haya e proceso aki un parti di diversificacion economico cu Gobierno ta pusha p'e pa cual lo sigui sostene e negoshinan cu ta haci esaki, ya cu nan ta percura pa divisas, crea empleo y estimulo di e economia. Tambe a splica Promer Minister Eman cu

propietarianan a inverti sumanan basta grandi pa automatiza e proceso di produccion y emboteyamento di cerbes y diferente tipo di refresco cu nan ta pone riba mercado. Loke ta admirabel ta cu un cantidad grandi di persona local ta hunga un rol prominente den henter e produccion y tambe den e laboratorio unda cu diferente tipo di control ta tuma luga "pa sigura calidad cu ta algo cu famia de Veer por ta hopi orguyoso di dje". Loke ta importante pa e mandatario ta pa mira cu local ta worde

produci na e fabrica, ta crea un cantidad grandi di cupo di trabao.

"Bo ta mira hende den diferente proceso di educacion na diferente nivel ta haya chens pa forma nan carera den e fabrica aki. Si tin hende ainda tin duda di loke nos mes por na Aruba, anto cana den e planta di Balashi y keda convenci cu ta hopi ainda ta localnan nos por haci na Aruba." Ademas di e controlnan local, e diferente marcanan cu ta bini for di exterior ta worde controla tambe door di e fabrica madre. Cada



bes ta haya confirmacion di con e produccion y proceso ta na Aruba, garantiza door di e fabrica na Balashi. Pa Gobierno di Aruba cu ta promove energia alternativa, ta un orguyo di mira cu e fabrica di Balashi tambe a tuma e rumbo aki. "Nan ta un di e promenan cu a haci un inversion hopi grandi, unda a instala e maximo posibel di panelnan solar cu ta produci

100 KW di coriente. Nos ta contento cu Balashi a duna e bon ehempel riba e tereno aki," e mandatario a bisa Wendell Bennett, Managing Director di Balashi. Eman a expresa cu esaki ta un confirmacion mas cu ta posibel pa tuma e rumbo di energia alternativo. Balashi a demostra di tin un bon fabrica cu bon productonan y un cantidad di Arubiano funcionando.